

TE HEHEURAA API

I neia i te piha neneiraa Univereti i Roto Miti i Utah no te Ekalesia a Iesu Mesia i te Feia Mo'a i te Mau Mahana Hopea Nei i Papeete, Tahiti, i te mau fenua Sotaiete, i te mau avae atoa.

Nu. 1

Tenuare, 1918

Mat. 12

E ora na roto ia Iesu o ratou atoa ta te Metua i tuu atu i roto i to'na mana, e o tei hamanikia e a'na; o tei faahanahana i te Metua, e o tei faaora i te mau ohipa atoa no to'na rima maori râ o te mau tamarii no te poke, o tei huna i te Tamaiti o ta te Metua i faaité mai ia'na. Buka Farau.

TE MATAHITI API.

Ia ora na te taata atoa i raro a'i i te tamärü o te Hau Farani i Oceania i roto i teie Matahiti Apî 1918. Ia tae mai te tau o te Matahiti Apî te horo nei te mana'o o Heheuraa Apî i to'na ra mau hoa i te mau fenua moana, e te parau atu nei hoi; Ia ora maitai outou i te Matahiti Apî. O teie hoi te tau e au i te taata e hi'o i muri e e hi'o i mua hoi, mai te feruri maite e i te uiui papu ia'na iho e, eaha te ohipa maitai ta'u i rave i te matahiti tei mairi i muri; ua oaoa hoi anei e ua maitai anei i te hoê mau taata i te ohipa ta'u i rave? Ahiri aita i maitai ai te hoê mau taata i te ohipa ta tatou i rave ra, e au roa ia parau e e matahiti manuïa ore teie ia tatou.

No reira i roto i teie matahiti apî a hamani-maitai atu tatou i te taata atoa; eiaha te hoê mahana ia mairi ia ore te hoê ohipa maitai ia ravehia. E tauturu atu i te feia veve ra e ia ratou hoi o te roohia i te mau ati rau te huru. E roaa

hoi i te taata i te oaoa rahi no te tauturu raa'tu i te feia roohia i te ati. A tamata tatou i te haapao i teie haapiiraa i roto i teie Matahiti 1918 ei reira e ite ai e parau mau roa ia.

E ITI ANEI TE FEIA E FAAORAHIA?

Tera mai hoi te hoê parau no te Mesia i papaihia i te Luka i te pene 13.

Haere atura oia i Ierusalema na roto i te mau oire e te mau oire rii i te haapii-haere-raa'tu. Ua parau maira te hoê taata ia'na, E te Fatu, e iti anei te ora? Ua parau atura oia ia ratou E faaitoito hua i te tomo na te uputa piri hao: e faaite atu hoi au ia outou, e rave rahi te tamata noa i te tomo i reira, e e ore roa e ô. Ua tia ana'e hoi te taata utuafare i nia, e ua haamau i te uputa, e ua tia mai outou i rapae au mai, patoto mai ai i te uputa, a na ô mai ai ra e, E te Fatu, e te Fatu, iriti a'e na ia matou; e riro oia i te na ô mai ia outou, Aore au i ite ia outou e to outou ra vahi: ei reira outou e parau mai ai e, I amu na hoi matou e inu na hoi i mua i to aro, e i haapii na hoi oe i te mau aroâ i ô matou ra. E parau atu â oia, Te parau atu nei au ia outou, aore au i ite ia outou e to outou na vahi, ia atea ê atu outou, e te mau rave parau ino. O te oto ihora te auau raa niho i reira ra, ia hi'o outou ia Aberahama, e ia Isaaka, e ia Iakoba, e te mau peropheta atoa tei roto i te basileia o te Atua, e hoparahia outou iho i rapae au; e tae mau â to te hitia o te râ, e to te tooa o te râ; to apatoerau, e to apatoa, e e riro ia ei manihini i te basileia o te Atua. E inaha, e riro to muri ra no mua, e to mua ra no muri. Luke 13:22-30.

O te haereraa i parau hia nei, o te haereraa hopea ia no Iesu na roto i te mau oire e te mau oire rii Galelea. E haere faataupupu hoi teie haereraa'tu i te satauro. Te huru ia ua faaineine hia te haerea i mua ia'na, e ua ineine hoi te

mau taata ia ite atu ia'na no te mea ua na mua oia i te tonono tatoopiti atu ai i te mau Hitu Ahuru i te mau vahi tana i opua e haere. E a haere ai Iesu i taua mau vahi ra ua farrerei ai oia i te mau tiaa taata e raverahi e ua a'o atu oia ia ratou e ua uiui mai nei ratou i te tahi mau uiraa. Ua uihia mai te tahi pae o taua mau uiraa ra ia roaa i te taata i te ite mau, e te tahi pae o taua mau uiraa ra ua tuuhia mai ia ei marei. I pahono maira te Fatu i te mau uiraa atoa ma te paari rahi.

O te hoê o te mau uiraa e uiraa faufaa rahi ia e ua tuuhia mai ia itea hia te parau mau. Tera mai hoi taua uiraa ra: "E te Fatu, e iti anei te ora? E aore râ ia au i ta tatou e paraparau nei; E te Fatu e rahi anei e aore râ e iti anei e faaora hia i roto i te baseleia o te Atua. E faatia paha te taata atoa e uiraa maitai roa te reira; e mai taua uiraa ra i au maitai roa i te tau tahito ua au maitai roa atoa i teie nei. Te tamata nei te tahi mau taata i te tatara i taua parau ra e aore râ e faarue i te reira ma te parauraa e, e ere ia i te uiraa faufaa roa. Aita râ e tia e faarue i taua uiraa ra no te mea te tuuhia noa nei â taua uiraa e te mau taata ra, oia hoi, i rotopu i te mau milioni o te tamarii o te Atua o te fanauhia mai i roto i te ao nei e i te mau milioni hoi e fanauhia mai; e rahi anei e faaorahia i roto i te baseleia o te Atua?

Aore hoi te Fatu i pahono tia'tu i taua uiraa ra, ua rave râ oia i te reira ei tumu parau no te hoê a'oraa poto e te faaitotito maitai. Ia uihia mai te Fatu ua au tana pahono-raa i te parau, eiaha outou e peapea i te reira vahi a tamata râ outou iho i te tomo na te uputa pirihaa a vai ai te ravea, eiaha e taupupu, a tomo na i teie nei. Eiaha e tia i noa ma te mana'o e, arau a'e e tomo ai, no te mea e tae te taime e opani hia taua uputa pirihaa ra. Ua mana'o hoi te tahi feia tahito e e ora noa ratou i roto i te baseleia o te Atua no te mea o ratou hoi e huaai ia no Aberahama e o te feia

HISTORIAN'S OFFICE LIBRARY

The Church of Jesus Christ of Latter-day Saints

13246

parauhia ratou, oia'toa te mana'o o te tahi mau taata i teie nei anotau, no te mea e feia toroa paha ratou i mua i te mau taata, ua mana'o ihora ratou e mea e papu roa e ora maitai ta ratou i te baseleia o te Fatu.

Mai tera hoi te huru o te haapiiraa o te Ekalesia nei, oia hoi, eita roa'tu te toroa teitei e noaa i te taata i te ora mure ore i roto i te baseleia o te Atua e eita'toa te i'oa roo maitai e faaora ia tatou, e eita atoa hoi te mau ohipa maitatai o to tatou mau metua e faaora mai ia tatou. Ia ore tatou e haapao maite i te mau ture o te evanelia nei e riro tatou i te tia i mua te uputa e tae atu ai i te baseleia ma te hi'o atu i te mau fetii e te feia maitatai i te omo raa i roto; e e ore e tia ia tomo tatou. Ei reira hoi e tupu i to tatou otoraa e te auauraa niho.

I roto hoi taua a'oraa na Iesu aita oia i pohono papu i ta ratou i ui mai e aita hoi oia i faaite mai e rahi hoi e aore râ e iti te taata e faaorahia. Aita paha oia i faaoti i ta'na a'oraa i taua taime ra no te mea aita paha e tia ia haaroaroa maitai taua feia ra i te mau haapiiraa hohonu.

I muri iho hoi i te po i haavare-hia'i oia ua parau rii â oia i nia i taua vahi ra, a na ô atu ai oia i te tino ahuru e ma piti; "E rave rahi te parahiraa mau i te fare o tau Metua ra; ahiri aita ra ua parau atu ia vau ia outou. Te haere nei au e haamaitai i te hoê vahi no outou. E ua oti ana'e i te faaauhia e au te hoê vahi no outou ra, e ho'i mai au e aratai ia outou i o'u ra; ei reira outou i te vahi e parahihia e au ra." I roto i taua parau ra ua huru maramarama tatou. I te matamua ua mana'o ihora te taata e piti ana'e vahi, oia hoi te ao ra e ia hade. E riro ia e i roto i taua na vahi e raverahi roa te mau vahi, te tahi e huru maitai ae i te tahi mai te huru ia e huru maitai ae te tahi fare parahiraa i te tahi fare. I muri iho i te poheraa o te Mesia na te hoê o to'na ia mau aposetolo o Paulo hoi i faarahi i nia i taua vahi ra. A papai ai Paulo i te Korinetia ua na ô mai

(E tuatihia i te api 9)

Na te Mau Tuahine i te Mau Paeau Fenua Moana na.

E to matou mau hoa here e,

Ia ora na outou atoa i roto i te aroha mau o to tatou Fatu o Iesu Mesia.

Te pahono atu nei matou i te lata ta Veneta peresideni o te mau tuahine i reira, i papai mai. Te faaite atu nei matou i to matou mauruuru rahi no te mau ohipa rahi i ravehia e outou na i te mau fenua moana na. Ua taiohia taua lata ra i mua i te aro o te mau tuahine rahi faatere ohipa i te ao taatoa nei, e ua faaite atoa mai ratou i to ratou oaoa e te popou rahi no te rahi o te ohipa ta outou i rave i na matahiti e piti i mairi a'enei.

Te na ô maira o Veneta i roto i taua lata ra: "Te nila nei te mau tuahine i te tifaifai e rau te huru e te nehenhe e te hanne atoa nei ratou i te taupoo, e te hopu nei ratou i te pârau ei imiraa moni no te tauturu i te mau vahi atoa e au no te mau ohipa a te mau tuahine ra." Taua ohipa hopuraa pârau a te mau tuahine ra, o te hoê ia ravea apî roa ei tauturu i te ohipa ta tatou e rave nei. E teie nei, o te taima matamua ia ta matou i farerei i te ohipa hopuraa pârau i roto i te mau ohipa atoa a te mau tuahine i te ao taatoa nei, aore roa matou i mana'o e, ua ite te mau tuahine i reira i te ohipa hopuraa pârau, ua mana'o râ matou e, o te mau tane ana'e tei ite i taua ohipa ra, e te maere nei matou ma te oaoa i te iteraa i taua ohipa apî hopuraa pârau ra.

E mea au rahi na matou i te faaroo pinepine i to outou itoitoe i roto i te ohipa a tē Atua, e ia tahoêhia tatou i roto i teie ohipa aroha rahi i te mau tau atoa e tia'i.

Te haere oioi nei teie nei ohipa a te mau tuahine, o te Ekalesia nei, i mua i roto i te ao taatoa. Te faaite mai nei

te mau peresideni tuahine o te mau paeau fenua e, na te mau taata i rapae i te faaroo nei i faaite mai ia ratou e, te taiete a te mau tuahine Momoni, o te hoê ia taiete maitai roa, e ua riro atoa ta ratou ohipa maitai e te tia ei ravea i te faafariu-raa mai na taata e rave rahi i roto i te faaroo nei.

I te hopea no Fubulare i mairi a'enei, ua tae to tatou peresideni rahi, o Emalena i te iva ahuru o to'na ra matahiti e te faaite mai nei oia e, ua mauruuru oia i te Atua no te maitai o to'na oraraa, e tae noa'tu i to'na ruhiruhiaraa te itoitonoa nei â to'na tino.

Te aroha'tu nei te mau tuahine rahi faatere ohipa a te mau tuahine ia outou atoa na i te mau paeau fenua moana na. Ia ora na outou atoa i roto i te aroha a te Atua. Amene.

Ua faauehia mai au e te peresideni rahi ia papai atu i teie lata ia outou na.

Papaihia e to outou tuahine
Ama B. Limona.

Te Ao Varua.

Te haapii mai nei te mai parau mo'a ra e te vai ra te varua o te taata nei i te ao varua hou a'e i tae mai ai ratou i te ao nei a rave atu ai i te hoê tino tahuti noa. E taua mau varua ra ta matou e faaite nei, o to tatou iho ia mau varua, e te vai ra hoi to tatou mau varua i te ao varua ra hou a'e a hamanihia'i i teie nei ao.

I Petero 1:19, 20. Ioba 38:4, 7. Koheleta 12:7.

Aita hoi te Atua i vai iho ia tatou i roto i te pōiri i taua vahi ra i teie nei mau mahana hopea nei. I te tau a parahi mai ai Iosepha Semita te peropheta ra i te ao nei, ua noaa

ia'na te hoê mau tuatapaparaa parau, o tei papaihia e te rima o Aberahama ra a parahi ai oia, o Aberahama i Aiphiti ra, e ere hoi taua mau tuatapaparaa parau ra i te Buka a Moromona, e parau ê te tahi e parau ê te tahi. E te i'oa o taua tuatapaparaa parau ta Aberahama i papai ra, o te Buka Poe Tao'a Rahi ia. Te na ô maira Aberahama i roto i taua buka ra.

I teie nei, inaha, ua faaite mai te Atua ia'u, ia Aberahama e, te mau varua e vai ra hou a'e a hamanihia'i i teie nei ao, e i rotopu i taua mau varua ta te Atua i faaite mai ra, te vai atoa ra na varua e rave rahi o tei hau i te paari e te ite i te tahi' e ua ite hoi te Atua i taua mau varua ra e e mau varua hau ana'e ratou i te maitai. E a parahi ai te Atua i rotopu ia ratou ra te na ô atura oia ia ratou: E faariro vau ia ratou ei mau taata rarahi i te faatereraa i ta'u ohipa; te tia noa ra te Atua i rotopu i taua mau varua ra, ite ihora oia e, e mau varua maitatai ana'e ratou; te na ô maira oia ia'u. E Aberahama e, o oe te hoê o ratou ra; na maitimau-hia oe hou a'e fanau mai ai oe i roto i teie nei ao.

Iritihia no roto mai i te Buka Poe Tao'a Rahi Aberahama 3:22, 23.

Te faaite papu mai nei teie irava i papaihia i nia nei e, te vai ra na varua e rave rahi i te ao varua hou a'e ratou fanau mai ai i roto i teie nei ao.

Mai te au i te Buka Poe Tao'a Rahi, o Iesu te hoê o taua mau varua paari e te ite ta te Atua i parau atura ra, e o Satane hoi te hoê o ratou ra. Ua maitihia râ Iesu ei Faaora i te mau taata atoa. O Satane râ, ua faaore-roa-hia ta'na ra titauraa tia ore.

Te tia ra te hoê mai te Atua te huru i rotopu i taua mau varua ra, i te na ôraa atu ia ratou e:

“E haere tatou i raro, no te mea e vahi to reira, e rave hoi tatou i te mau mea-rii-tumu ei hamani i te hoê ao ei parahiraa no ratou ra.” Buka Poe Tao’a Rahi Aberahama 3:24.

Ua papu roa ia tatou e te oaoa mau ra taua mau varua ta Aberahama i faaite maira, a faaroo ai ratou i te uiraa ta te Atua i ui atu ia Ioba, i te na ôraa e:

“Ua parau mai Iehova ia Ioba no roto i te puahi’ohi’o, na ô maira,

O vai teie e haapouri i te haapaoraa; i te parau ana’e ra aore i ite ra? A tatua na i to tauupu mai ta te taata ra; e ui na vau ia oe, e na oe e faaite mai ia’u. I hea oe ia’u i hamau i te tumu o te fenua nei? a faaite mai na, peneia’e te ite ra oe. Na vai i tuu i te faitoraa, ua ite hoi oe na? e na vai i tatai i te taura na nia iho? I haamauhia te niu i nia i te aha? e na vai i tuu i te ofai tihi, A fatu atoa’i te mau fetia poipoi i te himene, e ua pii noa te mau tamarii atoa a te Atua i te oaoa?” Ioba 38:1-7.

E ui mai te taata taio vea nei e, o vai mau ra te hoê pae o taua mau tamarii a te Atua ra o tei pii noa’tu i te oaoa mai ta Ioba i faaite maira.

Ioane a Moniko.

(E tuatihia mai i teie parau.)

TE PARAU NIUNIU.

I te fenua i Mixico, ua orure te mau initia i te hau i reira, e te faataa nei ratou i taua hau ra e riro paha, te reira ei ravea hoê ia maitai te fenua Mexico.

Ua ho’i faahou mai e piti faehau Tahitt na nia i te pahi vea ra o Moana, i te avae Mati nei, e mea maitai raua, mai roto roa mai ratua i te mau apoo tama’i.

Te aro puai ra te Italia i ta te Purutia tamataraa i te tomo i roto i to ratou fenua i te pae i Apatoerau, haapupu atura Farani e Beretane i te tauturu ia Italia, e i reira, ho’i ihora Purutia i muri ma te manuïa ore.

(Tuatiraa)

oia;'' Te mau mea hoi o te ra'i e te mau mea o te fenua, e anaana ê ra to te mau mea o te ra'i, e huru ê to te mau mea o te fenua nei. E anaana ê to te marama, e anaana ê to te mau fetia; e huru ê hoi to te tahi fetia i to te tahi i te anaana. Oia atoa te tia-faahou-raa o tei pohe ra.'' Kori-netia I 15:40-42.

Ua tuu faahou mai te Fatu i te maramarma i taua vahi ra i te tau hopea nei na roto i te vaha o to'na tavini o Iosepha Samita e e tia outou e tai'o i te reira i roto i te Buka Fafau Sanito i te pene 76. No te rahi o taua parau ra eita e nehenehe e papai i roto i teie parau iti. Teie râ ua ite tatou o te pohe nei, o te taa-ê-raa ia o te tino e te varua. Ua ite atoa tatou o te tiafaahou-raa o te apiti-faahou-raa ia o te tino e te varua, a ora faahou mai ai, mai i te matamua te huru. Ua ite atoa tatou e farii te feia faaroo i te tia-faahou-raa, e e farii atoa te feia hara e te etene atoa hoi. E ia ora faahou mai ratou o te oraraa mure ore ia te reira. Teie râ, e noaa te oraraa mure ore i te feia parau-tia i roto i te oaoaraa mure ore, i te vahi e parahi ai te Fatu ra. O te reira vahi o te vahi ia ta tatou e titau nei e eita roa'tu e noaa ia tatou i taua vahi ra maori râ na roto i te haapao hua i ta te evanelia i haapii mai. E no te feia hara, e roaa'toa ia ratou i te ora mure ore, eiaha râ i roto i te oaoaraa mure ore, i roto râ i te mauuira mure ore, i te vahi hoi i haapaohia e te Atua no ratou. E mai ta te mau parau mo'a i haapii mai e roaa te oramure ore i te pae rahi roa o te mau taata ra e o te hoê pae iti roa e roaa i te pohe, oia hoi te mau tamarii o te pohe. Aita hoi e hoê â faito te hanahana e noaa i te feia e ô i roto i te basileia o te Atua, e hanahana rahi to te tahi e e hanahana iti to te tahi. A tamata tatou i te roaa i te hanahana rahi, eiaha mai te tamata puai ore e te papu ore o te hinaaro, mai te tamata papu râ e te hinaaro papu atoa. Ia na reira tatou e manuia maitai ia.

Farani Fulumare.

TE MAU PARAU API.

I te avae Tenuare nei ua farerei te tahi oire rahi i Amarika i te tahi ueueraa fenua. E hoê afa minute te maoro o te ueueraa. Aita râ e rahi roa te ino.

Te tupu nei te mata'u rahi i te feia i Hawaii no te mea te uuru noa nei taua mou'a auahi ra Kilauea. Ua fatata i roa te apoo rahi i roto i taua mou'a ra i te ofai i faatarapapehia e te piha noa ra taua ofai ra mai te huru e pape ia. E hoê ahuru e ma pae avae ana'e tei toe ei reira e tahe taua ofai tarapapehia i te pae mou'a e e faaino faahouhia te mau faaapu e rave rahi.

I roto ia Tenuare nei ua pohe roa te Aposetolo Hairamu M. Samita, e tamaiti hoi oia no te Peresideni, Iosepha F. Samita. E taata maitai roa oia e te here-roa-hia e to te Ekalesia'toa e ua tausani atoa ta'na mau hoa i rapae au i te faaroo nei. I te mahana i hunahia'i oia ua tairuru mai e hoê ahuru e ma piti tausani o te taata e faatura'tu ia'na. Na te toea o te mau melo no te Tino Ahuru e ma Piti i hopoi i te afata vairaa tino. E 46 to'na matahiti a pohe ai oia.

E maa apî i teie nei, oia hoi te amu nei te mau taata i Tarafornia i te tahora. E ere hoi no te mea aita e puaatoro e te mamoe e te puaa maoahi. Ua titau te Hau Amarika ia haapae rii te mau taata i te amu i te puaatoro e te reira mau huru maa e ia haapaohia taua mau maa ra no te mau faehau ra i Europa. No reira te imi nei te taata ra i te maa apî no roto mai i te moana. Ua parauhia ei maa maitai te tahora ia faraipanihia e aore râ ia tunu pani noa. Ua tunuhia te tahora ei maa i roto i te mau fare taamaaraa i Tarafornia. E ere hoi te tahora i te i'a.



O to matou taeae teie o Birigama Robeta, ua ahuhia oia i to'na mau ahufae hau, e taata toroa oia i roto i te nuu faehau Amarika.

E toroa teitei atoa ta'na i roto i te Ekalesia, e hoê oia o na Peresideni e hitu no te mau Hitu Ahuru o te Ekalesia atoa.

I te oire rahi ra Chicago na te tahi mau taata eia haru i faaahu i te ahu mutoi e ua haere ratou i roto i te tahi faretoa hooraa daiamoni e te uati, etc., ua mana'o te mau taata hoo tao'a e mau mutoi mau ratou. Ua faaue maira te mau mutoi haavare ia haere i muri te mau taata hoo tao'a, haapao ihora taua mau taata ra i ta te mau mutoi haavare i faaue mai e ua haere ratou i muri roa i te tahi piha iti ei reira na te mutoi i taviri i te opani. Maiti noa te mau mutoi haavare i ta ratou i hinaaro e ua reva'tu. Ua haru ana'e ratou i te mau huru tao'a maitai roa. Ua parauhia te faufaa ta ratou i haru ra e roaa paha e 150000 dala.

I roto ia Tenuare nei ua roohia te tahi afa no te hau Amerika nei i te tahi ati ino roa. Oia hoi ua roohia te fenua i te toetoe iti rahi roa e aita hoi e arahu e taamahanahana i te mau fare ra, te mau fare parahiraa hoi e te mau fare rave ohipa'toa. Aita hoi e 'o'e arahu no te mea ua rahi roa te arahu i te tahi mau tufaa o te fenua; te peapea râ tei te mau pereoo auahi, aita e ravai te mau pereoo faauta arahu. Aita atoa e au i te mau pereoo puto e haere na te mau purumu auri na ratou no te rahi o te hiona i mairi apî mai.

Tei te tahi mau tufaa fenua i Amarika te hoê ture tahito maitai roa, oia hoi ia tairi te hoê tane i tana vahine e tairi atoa hia oia. Aita rea te mau haavaa e faautua te mau taata i taua utua. I teie avae ua tai'o matou i roto i te tahi vea ua faautuahia te hoê taata i taua utua ra. E toru ae taime ua afaihia taua taata ra i mua i te haavaa no te mea ua tairi oia i tana vahine, i te taime matamua ua faautuahia ia aufau e hoê ahuru e ma pae dala. I te piti o te taime ua faautua hia i te fare auri e toru ahuru o te mahana. I te toru o te taime ua parau mai te haavaa, aita e faufaa te mau utua noa i taua taata hupehupe ra e no reira ua faautuahia te taata ia au i te tahi ture tahito, oia hoi ia tairi-atoa-hia oia. Ua afaihia oia i te mahora o te fare auri, ua iritihia to'na ahu ouma e na te hoê mutoi rahi i tairi puai ia'na i te tahi tairi paahorofenua. E piti ahuru tairiraa i nia i te tua o taua taata. Ia oti ra paruparu roa oia e ua mana'o hia eita ona e tairi faahou i ta'na vahine. No te inuraa ava te tumu i tairi ai taua taata ra i te vahine. Aita rea te reira huru taata i iteahia i te mau fenua papaa, oia hoi e taata o te tupai i te vahine, e peu haamaa rahi roa te reira i te papaa.

TOAE A MAERE, Faaau Parau, Rue Dumont d'Urville, Orovini, Papeete, Tahiti.
 ERNEST C. ROSSITER, Imprimeur, Rue Brea et de la rue Damont d'Urville, Papeete, Tahiti.